

24. oktober 2000

UKA 2000/22

**Imigassanik aalakoornartortalinnik nioqquteqartarneq sassaallertarnerlu  
pillugit Inatsisartut inatsisissaattut siunnersuut**

**pillugu**

**ISUMALIUTISSISSIONT**

**inatsisissatut siunnersuutip aappassaaneerneqarnissaanut Inatsisartut  
Niuernermut Ataatsimiititaliaannit saqqummiunneqartoq**

Inatsisartut Niuernermut Ataatsimiititaliaat suliarinninnermini ukuninnga  
inuttaqarpoq:

Inatsisartuni ilaasortaq Mikael Petersen (Siumut), siulittaasoq  
Inatsisartuni ilaasortaq Malīnīnguaq M. Mūlgaard (Inuit Ataqatigiit), siulittaasup  
tullia  
Inatsisartuni ilaasortaq Tommy Marq (Siumut)  
Inatsisartuni ilaasortaq Augusta Salling (Atassut)  
Inatsisartuni ilaasortaq Mads Peter Grønvold (Katusseqatigiit)

**Tusarniaavigineqarnermit akissuteqarnissamut piffissarititaasimasoq pillugu:**

Inatsisartut Niuernermut Ataatsimiititaliaat tusarniaanermit akissutit nuutinneri,  
siunnersuutip saqqummiunneqartup ataatsimiititaliami suliarinerani atugassani,  
pissarsiarai.

Ataatsimiititaliap tassunga atatillugu paasivaa missingiusiaq pineqartoq ulloq 4. juni  
tusarniaassutigisassanngorlugu nassiunneqarsimasoq piffissarlu akissuteqarfissaq  
ulloq 19. julimut killilerneqarsimasoq.

Niuernermut Ataatsimiititaliaq isumaqarpoq piffissap sulinngiffeqarfiup nalaani  
sapaatip akunnerinik marluinnarnik piffissaliilluni tusarniaaneq  
akuersarneqarsinnaanngitsoq. Niuernermut Ataatsimiititaliap matumuuna  
innersuussutigissavai Inatsisit Atortinneqarnerannut Ataatsimiititaliap UPA 2000/09-  
mut (Namminersornerullutik Oqartussat missingersuutaat pillugit Inatsisartut  
inatsisaata nr. 8-ip 29. oktober 1999-imeersup allanngortinneqarneranik Inatsisartut

inatsisisaaattut siunnersuummut) isumaliutissiisummini tusarniaanerni piffissaliussat sivisussusii pillugit tunngaviusumik oqaaseqaatai, imaappullu:

*"Inatsisit Atortinneqarnerannut Ataatsimiititaliap tusarniaanernit akissutinik tunniussinissamut piffissaliussat sivikippallaartarneri arlaleriaqaluni isornartorsiortarpai." (...) "Taamaammat ataatsimiititaliap assut ajuusaarnartippaa paasigamiuk inatsisisatut siunnersuutit tusarniaassutigalugit nassiunneqaraangata akissuteqarnissamut piffissaliunneqartartut suli ima sivikitsigisut allaat oqartussaasut kattuffiillu attuumassuteqartut tusarniaaffigineqarnerminnit akissutinik imaqarluartunik saqqummiussinissaminnut periarfissaqartinnejqartaratik. Innuttaasut oqartussaaqataillugit naalakkersuinikkut ingerlaatsimi tunngaviit inatsisiliallu pitsaasuuunissaasa innimiginissaat taamaaliornikkut sumiginnarnejqartarput.*

*Tamanna tunngavigalugu Inatsisit Atortinneqarnerannut Ataatsimiititaliap Naalakkersuisut kaammattussavai inatsisisatut siunnersuutit, siunnersuutit soorpiarneri apeqqutaatillugit, sapinngisamik sivikinnerpaamik sapaatip akunnerinik sisamanik akissuteqarnissamut piffissaliilluni tusarniaassutigalugit nassiunneqartarnissaat qulakkeeqqullugu."*

Naalakkersuisut siunnersuutip pineqartup aappassaaneerneqarneranut akissuteqaamminni oqaatigaat Inatsisit Atortinneqarnerannut Ataatsimiititaliap tusarniaanerni piffissaliussat sivisussusiat pillugu kaammattuutaa eqqaamajumallugu.

Niuernermet Ataatsimiititaliap tamanna tunngavigalugu oqaatigissavaa tusarniaanermi piffissaliussap sivikippallaarnera sakkortuumik isornartoqartillugu.

### **Inatsisisatut siunnersuummut nassuaatit pillugit:**

Inatsisisatut siunnersuummut nassuaatini oqaatigineqarpoq tusarniaanermit akissutisiat "pisariaqarnera malillugu ilanngussuunneqartut.".

Niuernerfulli Ataatsimiititaliap tusarniaanermit akissutit misissuataarnerini paasivaa tusarniaanermit akissutini siunnersuutigineqartut ilaminiinnaat inatsisisatut siunnersuummut ilanngunneqarsimasut.

Tamanna immini Niuermet Ataatsimiititaliamit isornartoqartinnejqanngilaq. Naalakkersuisut siunnersuutit pineqartut inatsisisatut siunnersuummut ilanngunneqarnissaat pissusissamisuun-ngitsutut nalilissallugu tunngavissaqarluarsimasinnaapput. Niuerfulli Ataatsimiititaliap isornartoqartippaa siunnersuutit suut Naalakkersuisunit ilanngunneqarsimannginnersut, tamatumunngalu pissutaasut suunersut, inatsisisatut siunnersuummut nassuaatini nassuaatigineqarsimanngimmat.

Niuernermet Ataatsimiititaliap eqqaasitsissutigissavaa inatsisisatut siunnersuummut nassuaatit Inatsisartut aalajangiiniarnerminni tunngavissaasa pingarnerit ilagigaat.

Naalakkersuisut inatsisissatut siunnersuutinik saqqummiussigaangamik aalajangiiniarnermi tunngavissat tamakku tamakkiisutinnejartarnissaat akisussaaffigaat.

Tusarniaanermiit akissutisiat pisariaqarnera malillugu ilanngussuunneqarnerannik paasissutissiineq suliffeqarfiiit, kattuffit oqartussaasullu tusarniaavigineqartut inatsisissatut siunnersuummut Inatsisartunut saqqummiunneqarnermisut iluseqartumut tapersersuisinnaanerannik ilimasulersitsivoq.

Tusarniaanermiit akissutini pissarsiarineqartuni takuneqarsinnaavoq taamaattoqavissunngitsoq. Taamaammat inatsisissatut siunnersuummut nassuaatit paasissutissiinissaraluaminnut naleeqiullugu paatsuungatitsinerat annertuneruvoq, tamannalu Niuernermut Ataatsimiititaliap sakkortuumik isornartoqartippaa.

Niuernermut Ataatsimiititaliap paasissutissatut inatsisissatut siunnersuummut nassuaatini amigaatigineqartut pissarsiarinissaat siunertaralugu Inuussutissarsiornermut Naalakkersuisoq qinnuigisimavaa tusarniaanermiit akissutit pissarsiarineqarsimasut ataasiakkaat qanoq pineqarnissaat pillugu Naalakkersuisut qanoq isumaliutersuuteqarnerat nassuaateqarfigeqqullugu. Niuernermut Ataatsimiititaliap allagai Naalakkersuisunilu ilaasortap akissutaai Niuernermut Ataatsimiititaliap isumaliutissiissutaanut ilanngussatut ilaatinneqarput.

Aammattaaq Niuernermut Ataatsimiititaliap inatsisissatut siunnersuummut nassuaatit allanik amigaateqartutut, allaallu paatsoortitsisinnaasutut isumaqarfingai.

#### 1. Inatsisartut inatsisissaata aningaasatigut kingunerisassai pillugit paasissutissat:

Inatsisissatut siunnersuummut nassuaatini Inatsisartut inatsisissaattut siunnersuutip aningaasatigut kingunerisassaatut naatsorsuutigineqartut imatut paasissutiissutigineqarput:

*"Inatsisip aqutsinikkut aningaasaqarnikkullu annertuunik suliassaqarnerulerneq aningaasartuuteqarnerulerneq kingunerissagai naatsorsuutigineqanngilaq."*

Akileraartarnermulli Pisortaqarfip tusarniaavigineqarnerminit akissutaani makku paasissutissiissutigineqarput:

*"Akileraartarnermut Pisortaqarfik isumaqarpoq ulluinnarni arfinningornernilu nal. 09.00-imiit ammatitsisalerluni qasukkaanerup, inatsisissatut siunnersuummut kingullertut ilanngunneqartup, 3,6-inik atuinermiit immiaaqqanik nalinginnarnik imigassanillu kimittunerusunik atuinermut nooriaqqinneruneq imagassamillu atuinrerulerneq kingunerissagai.*

*Aamma Akileraartarnermut Pisortaqarfik isumaqarpoq tamanut ammasumik - minnerunngitsumillu naalakkersuinikkut - oqallinneq paasisitsiniaanerlu aaqqissuussamik ingerlanneqarpata ammatitsisarnikkut qasukkaaneq aallaqaataaniit isertitaqarnikkut pitsannginnerusumik kinguneqassasoq, tamannalu kingusinnerusukkut siammariartussasoq, taamaalillunilu isertitatigut sunniutissai*

*missingersuusiortarnermi nalinginnaasumik nalorninaataasartut iluanniilerlutik.  
Imigassamik atuineq tamakkiisoq soorunami taama ilusilimmik aamma  
ingerlasussaassaaq."*

Inatsisissatut siunnersuutip aningaasatigut kingunerisassai pillugit inatsisissatut siunnersummut nassuaatini oqaatigineqartut - Akileraartarnermut Pisortaqrarfiup tusarniaavigineqarnerminit akissutaa tunngavigalugu - equnngitsumik paasissutissiinerpiatut oqaatigineqarsinnaanngikkaluarpuit, Niuernermulli Ataatsimiititaliap isumaa naapertorlugu apeqqutaavoq tamakkiisumik paasissutissiinersut.

**2. Inatsisartut inatsisaat tunngavigalugu arsaarinnissinnaanermut tunngasut pillugit paasissutissiissutigineqartut:**

Inatsisissatut siunnersummut nalinginnaasumik nassuaatini oqaatigineqarpoq "inatsimik unioqqutitsilluni aalakoornartortalinnik angerlarsimaffinni imigassaliat aalakoornartortalinnillu angerlarsimaffimmi imigassaliornissamut nalinginnaasumik atortussat **Landskarsimut iluanaarutissanngorlugit** arsaarinnissutigineqartalernissaannut inatsisitigut tunngavissat atulersinneqartut."

Niuernermut Ataatsimiititaliamit oqaatigineqassaaq inatsisissatut siunnersummi takuneqarsinnaanngitsoq **Landskarsimut** iluanaarutissanngorlugit arsaarinnittalernissamut inatsisitigut tunngavissat atulersinneqarnissaat **pineqaratik naalagaaffiup karsianut** iluanaarutissanngorlugit arsaarinnittalernissamut inatsisitigut tunngavissat atulersinneqarnissaat **kisimik pineqartut**. Niuernermut Ataatsimiititaliap apeqqummut tassunga tunngatillugu Naalagaaffiup Sinnisaata tusarniaavigineqarnerminit akissutaa innersuussutigissavaa.

**3. Inatsiseqarnikkut pissutsinut atuuttunut naleqqiullugu allannguutit pillugit paasissutissiissutit:**

Aamma inatsiseqarnikkut pissutsinut atuuttunut naleqqiullugu allannguutaajunnartut inatsisissatut siunnersummut nassuaatini **erseqqissumik** oqaatigineqartariaqarnerat tikuassallugu Niuernermut Ataatsimiititaliaq tunngavissaqarsorivoq.

Soorlu Niuernermut Ataatsimiititaliap maluginiarpaat inatsisissatut siunnersummi § 13, imm. 5-6-imut, ukiunik akunnaatsuliilluni inuuissiortoqarneranut, katittoqarneranut il. il. atatillugu sapaammiit sisamanngorneq ilanngullugu unnuap qeqqata kingorna ataasiaannartumik akuersissumik tunniussisoqarsinnaaneranut tunngasumut, nassuaatini paasissutissiissutigineqanngitsoq piffissaq sassaallersinnaatitaaffik maleruagassanut atuuttunut naleqqiullugu nal. akunneranik ataatsimik sivikillineqarsimasoq.

Aammattaaq saqqummiussisummi tamanna passissutissiissutigineqanngilaq:

*"Naalakkersuisut paasisimavaat aappariinnermi ukiunik akunnaalliliinermut, nalliuottorsiugaqarnernut taamaaqataannullu aammalu Inatsisartunut*

*qinersisoqarnerani ulluinnarni nal. unnuap qeqqata kingornata tungaanut imerniartarfinni aaqqissuussinernut ataasiartumik akuersissummik pisoqarsinnaanissaanik kissaateqartoqartoq. Taamaattumik inatsisisstatut siunnersuut aalajangersakkamik taamaattumik imaqarpoq."*

Immikkoortoq issuarneqartoq atuarlugu eqqarsaqqaajaanarpoq aappariinnermi ukiunik 25-ngortorsiorluni nalliuottorsiorernut il. il. atatillugu sapaammiit sisamanngorneq ilanngullugu unnuap qeqqata kingorna imigassanik kimittuunik kimikitsunillu sassaallersinnaanermut ataasiaannartumik akuersissummik tunniussisoqarsinnaaneranut periarfissamik maannamut peqarsimanngitsoq.

Niuerermulli Ataatsimiititaliap erseqqissassavaa Namminersornerullutik Oqartussat imigassanik kimittuunik kimikitsunillu nioqquteqarnermut sassaallertarnermullu piffissarititaq pillugu nalunaarutaanni nr. 29-mi ulloq 27. november 1992-imeersumi § 3, imm. 4 naapertorlugu akunnaatsuliilluni inuuissiortoqarneranut, katittoqarneranut, peqatigiiffit atasimanerinut tunngatillugu nalliuottorsiorernut Inatsisartunullu qinersisoqarneranut atatillugu sapaammiit sisamanngorneq ilanngullugu ullormi aalajangersimasumi imigassanik kimittuunik kimikitsunillu **nal. 03.00-ip tungaanut** sassaallernissamut kommunalbestyrelsip akuersissuteqarsinnaaneranut inatsisitigut tunngavissaqartoq.

Taamaalluni siunnersummi § 13, imm. 5-imi nutaartatuaavoq piffissap sassaallersinnaatitaaffiup nal. akunneranik ataatsimik sivikillineqarnera.

Tamatuma inatsisisstatut siunnersuummut nassuiaatini erseqqissumik takuneqarsinnaannginnera, aammalu aalajangersakkap taassuma saqqummiussisummi eqqartorneqarnerata siunnersuutip kingunerisassai pillugit Inatsisartuni ilaasortanik kukkusumik isumalersitsisinnaanera annertuumik ajuusaarutigisarialittut Niuerermut Ataatsimiititaliamit isumaqarfigineqarpoq.

### **Inatsisisstatut siunnersuutip ilusiligaanera pillugu:**

Inatsisartut Niuerermut Ataatsimiititaliaat Inatsisartut Inatsisisanik Nalilersuisarfiannit allakkiamik pissarsivoq, tassanilu inatsisisstatut siunnersuummi kukkunerit pitsaanngequillu arlallit taagorneqarput. Allakkiaq Niuerermut Ataatsimiititaliap isumaliutissiissutaanut ilan-ngussatut ilaatinneqarpoq.

Aammattaaq inatsisisstatut siunnersuutip siullermeerneqarnerani inatsisisstatut siunnersuutip kalaallisuuani kukkunerit arlallit erseqqissaatigineqarput. Niuerermut Ataatsimiititaliap paasivaa inatsisisstatut siunnersuutip kalaallisua ammattaaq allatigut arlalinnik amigaateqartoq.

Niuerermut Ataatsimiititaliap isumaqatigiittup Naalakkersuisunut kaammattuitigissavaa kukkunerit pitsaanngequillu iluarsineqarsinnaaqquillugit allannguutissatut siunnersuutinik pisariaqartinneqartunik saqqummiusseqquillugit.

Niuernermut Ataatsimiititaliap ilanngullugu oqaatigissavaa kukkunerit uparuarneqartut ilaat siunnersuutip kukkunersiorneqarneratigut paasineqarsinnaasimagaluartut. Taamaammat Niuernermut Ataatsimiititaliaq pissutissaqarsorivoq erseqqissassallugu Inatsisartut kisimik pinnatik, aammattaaril Naalakkersuisut, inatsisiliat pisariaqassusiatut pitsaassuseqartittarnissaasa qulak-keerneqartarnissaat akisussaaffigaa.

### **Inatsisissatut siunnersuutip imarisai pillugit:**

Niuernermut Ataatsimiititaliap aallaqqaatigalugu oqaatigissavaa Inatsisartut inatsisissaattut siunnersuutip saqqummiunneqartup siullermeerneqarnerani imigassamut akitsuutip appartinnejarsinnaaneranik apeqqut saqqummiunneqartoq. Aammattaaq pinaveersaartitsiniarluni anguniakkat nalilersuiffigineqarnissaannik, pisariaqarpallu iluarsartuussivigineqarnissaannik, apeqqut oqaluuserineqarpoq.

Niuernermulli Ataatsimiititaliap apeqqutit taakku marluk pillugit inassuteqanngikkuni pitsaanerutippaa. Tamatumunnga illuatungaatigut pissutaavoq apeqqutit pingaarutillit marluk taakku Inatsisartut ataatsimiititaliaasa allat suliassaqarfiinut ilaanerat, illuatungaatigullu pissutaavoq aalajangiinissamut tunngavissat pisariaqartut (tassungalu ilanngullugit oqartussaasunut kattuffinnullu attuumassuteqartunut tusarniaanissat) pigineqalereersinnagit Inatsisartut taakku pillugit aalajangiinngikkallartariaqarnerannik Niuernermut Ataatsimiititaliap isumaqarnera. Niuernermulli Ataatsimiititaliap Inatsisartut ataatsimiititaliaannut attuumassuteqartunut kajumissaarutigissavaa apeqqutit tamakku suliniutigineri ingerlateqqeqquullugit, taakkulu aqqutigalugit pina-veersaartitsinermik politikip nukitorsarneqarnissaa suliniutigalugu.

Niuernermut Ataatsimiititaliap tulliullugu paasivaa siunnersuut immikkoortunik pingaarutilnik marlunnik imaqartoq: Illuatungaani imigassanik kimikinnerusunik nioqquteqartarneq sassaallertarnerlu imigassanik kimittuunik nioqquteqartarnermut sassaallertarnermullu naligitinneqalerpoq, illuatungaanilu piffissat sassaallerfissat sivitsorneqarlutik.

Niuernermut Ataatsimiititaliap isumaqatigiittup immiaaqqanik 3,6 %-imik aalakoornartortalinnik nioqquteqartarnerup sassaallertarnerullu imigassanik kimittuunik nioqquteqartarnerup sassaallertarnerullu killilersuiffigineqarnerattut killilersuiffigineqalernissaat iluarisimaarpa.

Taamatut sukaterinerup imigassanik kimittuunik imernerulerneq kingupilugeratarsinnaagaa Niuernermut Ataatsimiititaliap arajutsisimanngilaa. Niuernermulli Ataatsimiititaliaq isumaqarpoq sukaterinerup pitsaaqutissai kingunipilugisassaanit amerlanerusut:

Taamaallilluni imigassanik kimikitsunik nioqquteqarnissamut sassaallersinnaanissamullu akuersisummik peqartoqarnissaanik piumasaqaateqalernerup nioqquteqarfiiit sassaallertarfiillu piukkunnanngitsut nioqquteqarnissaminnut sassaallersinnaanissaminnullu

periarfissaqartinneqannginnissaat kingunerisussangussavaa. Peqatigitillugu aaqqissuussineq erseqqarinnerulissaq, tamannalu pisisartunut, pisiniarfutilinnut sutorniartarfutilinnullu kiisalu nakkutilliisutut oqartussaasunut iluaqutaassaaq. Aamma piffissat immiaaqqanik 3,6 %-imik aalakoornartortalinnik nioqquteqarsinnaatitaaffit il. il. killilersugaalissapput.

Niuernermut Ataatsimiitaliami amerlanerussuteqartut, tassaasut Siumup, Atassutip aamma Inuit Ataqatigiit ilaasortaatitaasa, ammasarfiiit sivitsorneqarnissaat isumaqataaffigaat. Ataatsimiitaliami amerlanerussuteqartut taakku arajutsisimanngilaat piffissat nioqquteqarsinnaatitaaffit sivitsornerisa imigassartornerup annertunerulernera kingunipilugeratarsinnaagaa. Ataatsimiitaliamili amerlanerussuteqartut uppераат imigassartorneq piffissap sivisuallyaanngitsup ingerlareerneratigut maannakkutut annertussuseqalerluni aalaakkaasunngussasoq. Ataatsimiitaliami amerlanerussuteqartut tamatumunnga peqatigitillugu neriuutigaat taamatut suliniuteqarnerup ungasissoq eqqarsaatigalugu innuttaasut ilaasa imigassamik pisiniartarnermut atuinermullu pissuserisartagaasa nalinginnaanerulernissaat kinguneriumaaraa. Taamaalillutik ataatsimiitaliami amerlanerussuteqartut isumaqarput killilersuinerit sukangasuut taamaaliornermi anguniarieqaraluartup akerlianik imigassap tungatigut ajornartorsiutinik annertusaaqataaginnartartut, tassa killilersuinerit nioqqutissiat pineqartut pileragineqarnerulersiinnartarmatigit.

Kisiannili ataatsimiitaliaq isumaqatigiittooq isumaqarpoq ullut 23. december aamma 30. december sapaataagaangata ulluni taakkunani nioqquteqarsinnaaneq ammaanneqartariaqanngitsoq.

Ataatsimiitaliami ikinnerussuteqartup, Kattusseqatigiit ilaasortaatitaata, piffissat nioqquteqarsinnaatitaaffit sassaallersinnaatitaaffillu sivitsorneqarnissaannik siunnersuut akuersaarsinnaanngilaa. Ikinnerussuteqartoq isumaqarpoq inuiaqatigiinni imigassaq taama ajornartorsiutaatigitillugu taamatut qasukkartitsinissamut piffissanngorsimanngitsoq.

### **Inassutigineqartut allannguutissatullu siunnersuutit:**

Ataatsimiitaliap isumaqatigiittup Naalakkersuisunut kaammattutigissavaa allannguutissatut siunnersuutinik, kukkunerit pitsaanngequtillu isumaliutissiisummi uani tikkuarneqartut iluarsiissutissaannik, saqqummiusseqqullugit.

Taassuma saniatigut Niuerermut Ataatsimiitaliaq isumaqatigiittooq allannguutissatut siunnersummik imaattumik saqqummiussaqarpoq:

Imigassanik aalakoornartortalinnik nioqquteqartarneq sassaallertarnerlu pillugit  
Inatsisartut inatsisissaattut siunnersummumut

allannguutissatut siunnersuut.

Niuernermut Ataatsimiititaliamit isumaqatigiittumit saqqummiunneqartoq.

§ 11-mut

**1. § 11, imm. 3** peerpoq.

§ 12-imut

**2. § 12, imm. 3** peerpoq.

§ 13-imut

**3. § 13, imm. 5-imi** "nal. 02.00" imaalersillugu allanngortinnejassaaq: "nal. 03.00".

**4. § 13, imm. 6-imi** "nal. 02.00" imaalersillugu allanngortinnejassaaq: "nal. 03.00".

Taakku saniatigut ataatsimiititaliami ikinnerussuteqartoq, Kattusseqatigiit ilaasortaatitaat, allannguutissatut siunnersummik imaattumik saqqummiussaqarpoq:

Imigassanik aalakoornartortalinnik nioqquteqartarneq sassaallertarnerlu pillugit  
Inatsisartut inatsisissaattut siunnersummum  
allannguutissatut siunnersuut.

§ 11-mut

**1. § 11, imm. 1** ima oqaasertalerneqassaaq:

"Imigassanik kimittuunik nioqquteqarneq ataasinngornermiit tallimanngorneq ilanngullugu nal. 12.00-imiit nal. 18.00-imut, arfininngornikkut nal. 11.00-imiit nal. 13.00-imut psinnaavoq."

§ 12-imut

**2. § 12, imm. 1** ima oqaasertalerneqassaaq:

"Imigassanik kimikitsunik nioqquteqarneq ataasinngornermiit tallimanngorneq

ilanngullugu nal. 12.00-imiit nal. 18.00-imut, arfininngornikkut nal. 11.00-imiit nal.  
13.00-imut psinnaavoq."

Mikael Petersen, Siumut  
udvalgsformand

Malīnīnguaq M.  
Mulgård, Inuit  
Ataqatigiit

Tommy Marø, Siumut

Augusta Salling, Atassut

Mads Peter Grønvold,  
Kattusseqatigiit